

PRAVILNIK O RADU MEDŽLISA
ISLAMSKJE ZAJEDNICE BOŠNJAKA SJEVERNE AMERIKE

Član 1.

Uvodne odredbe

Medžlis je viša organizaciona jedinica Islamske zajednice Bošnjaka koja obuhvata džemate koji čine povezanu cjelinu jedne regije.

Medžlis sačinjava najmanje deset džemata na jednom području.

Ovim Pravilnikom se utvrđuju način rada u okviru medžlisa, nadležnosti Oblasnog imama, postupak donošenja akata, prava i dužnosti članova skupštine medžlisa i druga pitanja u vezi sa radom skupštine medžlisa.

Organi medžlisa su Skupština medžlisa, Oblasni imam i Nadzorni odbor medžlisa.

Član 2.

Oblasni imam

Oblasni imam saziva sjednice skupštine medžlisa.

Oblasni imam predsjedava skupštinom medžlisa.

Oblasni imam se brine o vjerskom životu na području medžlisa i odgovaran je za rad imama, hatiba i muallima na području medžlisa.

Oblasni imam predstavlja medžlis u stvarima vjere.

Oblasni imam nadgleda i koordinira rad imama u džematima.

Oblasni imam se stara o kvalitetu rada imama i daje smjernice imamima na području medžlisa u vezi sa mektebskom nastavom i radom sa omladinom.

Oblasni imam pomaže imamima u osmišljavanju i pripremanju polaznika mektebske nastave za takmičenje mekteba na nivou medžlisa.

Član 3.

Skupština medžlisa

Skupštinu medžlisa čine predstavnici džemata koji se biraju na osnovu broja članova džemata po sljedećem kriteriju:

1. Džemati koji broje do 150 (sto pedeset) članova biraju jednog člana u skupštinu medžlisa
2. Džemati koji broje između 151 (sto pedeset i jedan) i 300 (tri stotine) članova biraju dva člana u skupštinu medžlisa
3. Džemati koji broje preko 300 (tri stotine) članova biraju tri člana u skupštinu medžlisa

Oblasni imam i imam džemata su članovi skupštine medžlisa po položaju, neovisno o broju delegata.

Članovi skupštine medžlisa biraju sekretara medžlisa. Skupštinom medžlisa predsjedava Oblasni imam.

Skupština medžlisa prati i koordinira ukupan rad džemata u okviru medžlisa i daje neophodne smjernice u radu džematskih odbora.

Skupština medžlisa izvršava odluke i provodi uputstva viših organa Islamske zajednice i usvaja godišnji izvještaj.

Skupština medžlisa bira i kandiduje člana Upravnog odbora iz reda džematlija ispred datog medžlisa.

Skupština medžlisa, uz konsultacije sa Oblasnim imamom, utvrđuje mjesto i vrijeme održavanja mektebskog takmičenja na nivou medžlisa.

Kvorum Skupštine medžlisa čini natpolovična većina od ukupnog broja delegata.

Član 4.

Nadzorni odbor medžlisa

Nadzorni odbor medžlisa koordinira rad džematskih odbora i daje im uputstva za rad. Nadzorni odbor je nadležan da rješava eventualne sporove u džematima na području medžlisa. Nadzorni odbor medžlisa broji 5 članova.

Član 5.

Sjednice Skupštine medžlisa

Oblasni imam priprema, saziva i vodi sjednice Skupštine medžlisa. Sjednica Skupštine medžlisa se održava najmanje jednom godišnje. Članovi Skupštine medžlisa dobivaju materijal za sjednicu Skupštine od sekretara medžlisa najmanje 10 (deset) dana prije sjednice.

Sekretar Skupštine medžlisa vodi zapisnik sa sjednica Savjeta medžlisa.

Zapisnik mora sadržavati: redni broj sjednice, mjesto i datum održavanja, vrijeme početka i završetka, popis prisutnih, rezultate glasanja i prijedloge i odluke u vezi svake tačke dnevnog reda. U prilogu moraju biti svi materijali o kojima se na sjednici raspravljalo. Zapisnik sa sjednice se mora izraditi u roku od petnaest dana od zaključenja sjednice i smjestiti u arhivu sa odlukama Skupštine medžlisa. Potpisani zapisnik se više ne smije ispravljati, mijenjati ili nadopunjavati.

Članovi Skupštine medžlisa glasanjem odlučuju da li se dnevni red dopunjuje ili ne, nakon izlaganja predsjednika. Nakon otvaranja sjednice i prihvatanja zapisnika sa posljednje sjednice Oblasni imam podnosi kratki izvještaj o radu u u periodu između dvije sjednice. Zatim se raspravlja o tačkama dnevnog reda, na taj način da ih Oblasni imam iznosi i da se zatim članovi Skupštine medžlisa javljaju, a u slučaju potrebe komentiranja, za diskusiju koja ne može biti duža od 3 minute, a kod replike do 1 minute. Isti član se može javiti za ponovnu diskusiju tek kad svi članovi završe sa svojim diskusijama.

Kod potrebe donošenja odluka svi članovi glasaju i odluka se prihvata kad je donesena većinom

Član 6.

Odluke Skupštine medžlisa

Odluke Skupštine medžlisa bilježi sekretar medžlisa na temelju zapisnika, a potpisuje Oblasni imam, a u njegovoj odsutnosti sekretar, ako je predsjedavao cijeloj ili dijelu sjednice.

Član 7.

Izmjene i dopune

Izmjene i dopune ovog Pravilnika donose se postupkom po kojem je donesen i sam Pravilnik. Ovaj Pravilnik stupa na snagu danom prihvatanja od strane sabornika Islamske zajednice Bošnjaka dana 29. Marta 2015. god.